

宋史新編

宋史新編卷六十五

列傳七

明南京戶部主事莆田柯維騏著

范質

子旻兄  
子杲

王溥

魏仁浦

子咸信  
孫昭亮

范質字文素大名宗城人九歲能屬文十三治尚書教  
授生徒後唐第進士歷封丘令晉天福中以文干宰相  
桑維翰器之卽奏爲監察御史累遷翰林學士知制誥  
漢加中書舍人戶部侍郎周祖起兵向闕質匿民間物  
色得之令草太后誥及議迎湘陰公儀注質蒼黃論撰  
稱旨迺白太后以質爲兵部侍郎樞密副使廣順初累  
進左僕射兼門下侍郎平章事監脩國史又加司徒弘

文館大學士顯德中世宗命詳定律條是爲刑統從質  
議也世宗北征還以魏仁浦爲相命質與王溥並參知  
樞密院事及不豫入受顧命恭帝嗣位加開府儀同三  
司封蕭國公太祖爲六師推戴自陳橋還府署質率溥  
仁浦謁見隆階受命事在帝紀既卽位加質兼侍中罷  
參知樞密質上奏爲宰相者當舉賢能以輔佐天子竊  
以端明學士呂餘慶樞密副使趙普精通治道乞授台  
司帝嘉納之先是宰相見天子議大政事必命坐賜茶  
唐及五代其制猶存及質等憚帝英睿請每事具劄子  
進呈由是奏御寔多始廢坐論之禮乾德初將有事園

丘質與張昭劉溫叟討論舊典定南郊行禮圖上之進  
封魯國公明年罷爲太子太傅卒年五十四遺戒勿請  
謚勿刻墓碑贈中書令質力學強記舉進士時和凝典  
貢部覽其文重之自以登第名在十三亦處以是數貢  
闈中謂之傳衣鉢其後質位皆與凝同云初質既登朝  
猶手不釋卷人或勞之質曰相者謂我異日位宰相誠  
如其言不學何術以處之後從世宗征淮南詔令多出  
其手文士莫不驚伏世宗因事怒竇儀罪在不測質入  
謁曰儀近臣也過小不當誅因免冠叩頭泣下曰臣備  
位宰相豈可使人主暴怒致近臣於死地耶世宗卽遣

救儀質性廉介祿賜多給孤遺閨門之中食不異品身  
沒家無餘貲太祖謂侍臣曰范質止有居第不事生產  
真宰相也太宗亦曰宰輔中能循規矩慎名器持廉節  
無出質右者但欠世宗一死爲可惜爾有集三十卷又  
有通錄六十五卷子旻兄子杲

旻字貴參以父任累遷著作佐郎宋初爲度支員外郎  
歷知邕州兼水陸轉運使會南漢來攻旻屢出戰矢集  
於胸猶激勵將卒堅壁固守救兵至圍解疾愈通判鎮  
州遷庫部員外郎久之知淮南轉運事許便宜從事歲  
運米百萬石給京師當時稱有心計太平興國初召爲

水部郎中錢倣獻地以曷爲考功郎中權知兩浙諸州  
軍事車駕征晉陽乃爲右諫議大夫師還加給事中坐  
受人請求擅市竹木貶房州司戶語在王仁贍傳量移  
唐州卒有集十卷其後詔復舊官

杲字師回刻志於學爲文深僻難曉以蔭入官太平興  
國初歷右拾遺左補闕雍熙中上書自言其才比東方  
朔求顯用以觀其效太宗壯之擢知制誥杲家貧多借  
貸母兄與元少尹晞居京兆殖貨鉅萬或給杲曰少尹  
不復吝施已揮金無筭矣杲因求典京兆以便養旣至  
而晞吝如故杲大悔移知壽州上言家世史官願秉直

筆成國朝大典召爲史館修撰固求掌誥詞從之杲連致書相府求爲學士太宗飛白書玉堂額賜翰林杲又上玉堂記且請備職太宗惡之改右諫議大夫知濠州復召還史館卒杲素躁競質嘗作詩戒之與人交好面譽背非惟與柳開相引重始終無間不善治生家益貧終日端坐不知計所出云

王溥字齊物并州祁人父祚爲郡小吏有心計歷仕晉漢周爲鄭州團練使宋初升宿州爲防禦以祚爲使課民鑿井脩火備築隄以禦水災拜左領軍衛上將軍致仕溥乾祐中進士甲科爲祕書郎周祖將兵討李守貞

辟爲從事事本得賊中文書多朝貴及藩鎮相交結語  
周祖籍其名將按之溥諫曰魑魅之形伺夜而出日月  
既照氛沴自消願一切焚之以安反側從之遷太常丞  
歷端明殿學士周祖疾革召學士草制以溥爲中書侍  
郎平章事世宗加兼禮部尚書監脩國史從平壽春制  
加階爵顯德四年丁外艱起復表辭者四世宗大怒宰  
相范質奏解之溥懼入謝六年夏命參知樞密院事恭  
帝嗣位加右僕射宋初進司空罷參知樞密院乾德中  
罷爲太子太保又加太子太傅開寶二年遷太子太師  
太平興國初封祁國公七年卒年六十一贈侍中諡文



獻祚頻領牧守能殖貨家累萬金溥在相位諷求致政  
祚意朝廷未之許也既得請大罵溥曰我筋力未衰汝  
欲自固名位而幽囚我舉大槌將擊之親戚勸諭乃止  
溥好學手不釋卷嘗集唐會要及五代會要有集二十  
卷罷相時作自問詩述平生踐歷以榮遇爲幸人擬之  
長樂老云子貽孫顯德中爲著作佐郎宋累遷右司郎  
中太祖嘗問趙普拜禮何以男子跪而婦人否普問禮  
官不能對貽孫曰古詩云長跪問故夫是婦人亦跪也  
唐太后朝婦人始拜而不跪普問所出對云大和中幽  
州從事張建章著渤海國記言其事普大稱賞李昉求

郡省百官集議舊儀貽孫具以對時稱其諳練四子貽  
序景德二年進士孫貽永在外戚傳

魏仁浦字道濟衛州汲人晉末隸樞密院爲小史謹厚  
善書計漢祖起迎謁道左卽補舊職遷兵房主事從周  
祖鎮鄴會隱帝誅大臣楊邠史弘肇等密詔澶帥李洪  
義殺騎將王殷令郭崇害周祖洪義恐事不濟與殷謀  
遣齋詔示周祖事見洪義傳周祖懼召仁浦入計仁浦  
曰侍中握強兵臨重鎮有功朝廷君上信讒圖害忠良  
雖欲割心自明奚可得也莫若易詔以盡誅將士爲名  
激其怒心非徒自免亦可爲楊史雪冤周祖納其言倒

用留守印易詔示諸將衆懼且怒遂長驅渡河及卽位以仁浦爲樞密副承旨俄遷右羽林將軍充承旨世宗初授右監門衛大將軍樞密副使已遂爲使加至檢校太傅進爵邑遷中書侍郎平章事集賢殿大學士兼樞密使恭帝嗣位加刑部尚書宋初進右僕射乾德初罷守本官未幾卒年五十九贈侍中仁浦性寬厚務以德報怨漢隱帝寵賈延徽屢譖仁浦幾至不測及周祖入汴有擒延徽授仁浦者仁浦謝曰因兵戈以報怨不忍爲也力保全之時稱其長者世宗朝近侍有忤上至死者賴仁浦申救免者甚衆景德中謚宣懿三子咸信

咸信字國寶選尚太祖女歷拜彰德軍節度知澶州真宗累加檢校太尉歷忠武軍節度召還年已昏眊見上希旨求寵渥表乞任用上出示中書曰咸信聯榮戚里位居節制復何望耶是多加同平章事俄判天雄軍後改陝州大都督府長史保平軍節度卒贈中書令咸信頗知書善待士然性吝喜利仁浦所營邸舍悉擅有之既卒爲諸姪所訟主生子昭亮字克明累遷四方館使仍兼掌客省昭亮數求進用如兼端州防禦使未及拜命死仍以制書賜其家贈貝州觀察使昭亮與陳彭年款昵彭年嘗稱其才性陰險務偵伺僚輩發其事時人

惡之

論曰范質持廉奉法王溥魏仁浦寬厚長者皆周世宗所拔擢賢宰相宋興爲將校迫脇遂巡北面以倡羣臣誠有佐命功然宋匪久策免豈忘之耶抑鄙之耶備夫計直自給亟易主而不嫌是屬亦務全軀保妻子寧恤人國之存亡哉質垂沒寢謚之戒追悔何及以彼平生清雅博聞竟碌碌若是他尚奚訾假令伏節完令各當與夷齊爭烈矣

石守信

子保興保吉孫元孫

王審琦

子承衍承衍孫克寧等

高懷德

韓重贇

子崇訓崇業

張令鐸

羅彥瓌

王彥昇

石守信浚儀人初隸周祖帳下累功至殿前都指揮使領洪州防禦使加領義成軍節度宋初遷侍衛馬步軍副都指揮使改領歸德軍以討李筠功加同平章事及討李重進以爲行營都部署兼知揚州行府事帝親征守信贊帝亟赴遂克其城明年移鎮鄆州兼侍衛親軍馬步軍都指揮使乾德初帝與守信等飲酒酒酣帝曰我非爾曹不及此然吾爲天子殊不若節度使之樂吾終夕未嘗安枕臥也守信等頓首曰天命已定誰敢有異心陛下何爲出此言帝曰人孰不欲富貴一旦有以

黃袍加汝身雖欲不爲其可得乎守信等謝曰臣愚不  
及此惟陛下哀矜之帝曰人生駒過隙爾不如多積金  
市田宅以遺子孫歌兒舞女以終天年君臣之間無所  
猜嫌不亦善乎守信謝曰陛下念及此所謂生死而肉  
骨也明日皆稱病乞解兵權皆以散官就第已而帝欲  
使符彥卿管軍趙普屢諫帝曰朕待彥卿厚豈負朕耶  
普對曰陛下何以能負周世宗帝默然事遂止開寶中  
加守信兼侍中太宗進封衛國公又徙鎮陳州復守中  
書令卒年五十七贈尚書令諡武烈守信專務聚斂積  
財鉅萬尤信奉氏子保興保吉

保興字光裔以蔭歷銀夏綬府都巡檢使嘗巡按番子  
砦竝黑水河趣谷中夏人以數千騎據險渡河求戰保  
興所部不滿二千人乃分短兵伏方河滸俟其半渡急  
擊之斬首百餘級追北數十里累遷延州都巡檢使兼  
署州事改本路副都部署與范廷召等五路討賊咸平  
中知威虜軍又就拜棣州防禦使徙知邢州改澶州在  
郡頗峻刑罰云子元孫

保吉字祐之選尚太祖女歷官檢校太尉保平軍節度  
景德初改武寧軍節度同平章事真宗幸澶淵命與李  
繼隆分爲駕前東西面都排陣使軍于北門外虜騎數



萬驟至城下保吉不介馬而馳當其鋒遂引去俄而請盟錫宴射於行宮後苑帝曰息戰安民卿等力也保吉進曰臣受命禦患上稟成筭至於布列行陣指授方略皆出繼隆繼隆曰宣力用心躬率將士臣不及保吉帝曰卿等協和共致太平軍旅之事朕復何憂歡甚賜衣帶鞍馬明年改鎮安軍節度後又加檢校太師卒贈中書令諡莊武保吉姿貌瓌碩頗有武幹累世將相多財好治生射利善弋獵畜鷲禽獸數百性尤驕倨峻暴集齊查道皆知名士嘗械以運糧云

元孫字善良以蔭歷侍衛親軍步軍殿前都虞候鄜延

副都總管緣邊安撫使遷邕州觀察使康定初夏人寇延州元孫與戰于三州口軍敗見執及元昊納款縱元孫歸諫官御史奏元孫軍敗不死辱國請斬塞下賈昌朝奏曰前代將臣敗覆而還多不加罪帝乃貸元孫安置全州後徙許州還京師卒

王審琦字仲寶其先遼西人初隸周祖帳下以功署廳直左番副將累以功進擢訖周朝為殿前都虞候領睦州防禦使宋初擢殿前都指揮使領泰寧軍節度澤潞平改領武成軍節度明年出為中正軍節度在鎮八年為政寬簡開寶中改鎮許州後加同平章事卒年五十

審琦重厚有方略尤善騎射鎮壽春歲得租課量入爲  
出未嘗有所誅求素不能飲嘗侍宴太祖酒酣仰祝曰  
酒天之美祿審琦朕布衣交方與朕共享富貴何獨靳  
之祝畢顧謂審琦曰天必賜卿酒量試飲之勿憚也審  
琦受詔飲十杯無苦自此侍宴常引滿及歸卽不能飲  
或強飲輒病子承衍承衍與承衍之孫克臣克臣子師  
約竝知名

承衍字希甫幼端謹尚太祖女授駙馬都尉踰年領恩  
州刺史加本州防禦使太平興國中遷至彰國軍節度  
雍熙中出知天雄軍府兼都部署端拱初換永清軍節

度使再知天雄軍吏民詣監軍請承衍爲本道節帥詔  
褒異之真宗卽位改河中尹護國軍節度加檢校太尉  
卒贈中書令謚恭肅承衍善騎射曉音律頗涉學藝好  
吟咏云

承衍字希悅開寶中授開廐使纔十二歲累遷永州刺  
史真宗以天水近邊蕃漢雜處擇守臣撫治擢承衍知  
秦州徙天雄軍後進東上閣門使賜告家居以久不朝  
請求近郡改左武衛大將軍知壽州卒承衍頗涉學喜  
爲詩曉音律多與士大夫遊豁如也

克臣字子難第景祐進士仕累通判壽州鼓角卒夜入

州麻擊郡將既就擒猶坐貶監潭州稅厰寧中遷鹽鐵副使時鄭俠竄嶺表克臣嘗薦俠且餽之金坐奪官復為戶部副使以集賢殿修撰知鄆州河決曹村克臣亟築隄城下隄成水大至不沒者才尺餘復起甬道屬之東平王陵埽人得趨以避水事寧皆繪像祀之進天章閣待制徙知瀛州又徙太原為王中正所誣黜單州明年拜工部侍郎神宗幸尚書省至部舍止輦獎其治力元祐中以龍圖閣直學士太中大夫卒

師約字君授少習進士業英宗欲求儒生為主壻遂賜對選為駙馬都尉賜九經筆硯勉之進學神宗遷成州

團練使故事主壻未嘗居職帝始令帥約同管當三班  
院試其才明年主就館乃罷哲宗立遷鎮安軍節度觀  
察留後宣仁臨朝屢上書言事元符初議者以言非其  
職褫秩徽宗卽位乃復保平軍留後又爲樞密都承旨  
未幾罷

高懷德字藏用真定人天平節度齊王行周之子懷德  
忠厚倜儻有武勇行周署以牙職晉開運初契丹侵邊  
以行周爲都部署懷德始冠白行周願從北征遇敵被  
圍危甚懷德左右射縱橫馳突衆皆披靡挾父而出遷  
至信州刺史漢爲忠州刺史行周凡更數鎮懷德皆領

牙校行周卒召懷德改鐵騎都指揮使世宗討劉崇以懷德爲先鋒都虞候高平克捷連遷龍捷左廂都指揮使領岳州防禦使恭帝嗣位擢爲侍衛馬軍都指揮使領江寧軍節度又爲北面行營馬軍都指揮使太祖卽位拜殿前副都點檢移鎮滑州充關南副都部署尚宣祖女加駙馬都尉帝將親征李筠先命懷德與石守信進攻破其衆又從平揚州遷至歸德軍節度檢校太尉加同平章事主薨去駙馬都尉號太平興國初加兼侍中又加檢校太師其後從平太原改鎮曹州封冀國公又改武勝軍節度卒贈中書令謚武穆懷德將家子練

習戎事好射獵不喜讀書性簡率不拘小節善音律自  
爲新聲度曲極精妙云

韓重贇武安人少以武勇隸周祖麾下累功遷至控鶴  
軍都指揮使領虔州刺史宋初擢爲龍捷左廂都校領  
永州防禦使從征澤潞還領江寧軍節度討李重進爲  
行營馬步軍都虞候改殿前都指揮使領義成軍節度  
時有譖重贇私取親兵爲腹心者太祖怒欲誅之趙普  
諫曰重贇以讒誅卽人人懼罪誰復爲陛下將親兵者  
事遂已後重贇聞之詣普謝普拒不見出爲彰德軍節  
度太祖征太原過其郡命爲北面都部署銜枚夜發遇



契丹兵大破其衆獲馬數百匹優詔褒美卒贈侍中子  
崇訓崇業重寶與張光翰趙彥徽分領諸軍節度嘉其  
翊戴功也彥徽與太祖同事世宗太祖兄事之二人卒  
皆贈侍中

崇訓字知禮以蔭歷邊郡累敗李繼遷又歷諸路都巡  
檢使諸州鈐轄累敗契丹遷至四方館使樞密都承旨  
最後爲鎮定高陽馬步軍都鈐轄屯定州拜檢校太傅  
大中祥符二年授右龍武軍大將軍領昭州防禦使分  
司西京卒崇訓爲人長厚謙畏未嘗忤物子允恭禮賓  
副使有謀略好學能世其家

崇業字繼源選尚秦王廷美女授駙馬都尉廷美得罪  
削秩從貶房陵廷美卒起爲靜難軍行軍司馬歷左屯  
衛大將軍領高州團練使卒

張令鐸棣州馱次人少以勇力隸軍伍事後唐及晉漢  
至奉國軍指揮使周歷侍衛親軍步軍都指揮使領武  
信軍節度使宋初遷馬步軍都虞候領陳州節制明年  
爲鎮寧軍節度帝爲皇弟光美娶其女來朝卒於京師  
贈侍中令鐸性仁恕嘗曰從軍三十年大小四十餘戰  
多摧堅陷敵未嘗妄殺一人云

羅彥瓌太原人父全德晉淄州刺史彥瓌得補內殿直

至興順指揮使開運末契丹至汴遣彥環送厩馬千匹  
赴幽薊彥環聞漢祖建號太原以馬歸漢擢護聖指揮  
使周歷遷散指揮都虞候太祖自陳橋還宰相范質等  
至未及言彥環挺劍而前質等降階聽命語在本紀擢  
控鶴左廂都指揮使改內外馬軍都軍頭領眉州防禦  
使歷安國軍節度與李繼勳大破契丹又與田欽祚殺  
太原軍千餘人禽其將移鎮華州卒

王彥昇字光烈後唐徙家洛陽以驍勇得補東班承旨  
晉轉內殿直以功遷護聖指揮使周以功累轉散員都  
指揮使太祖爲衆推戴彥昇以所部先入京遇韓通逐

至第殺之彥昇拜恩州團練使領鐵騎左廂都指揮使  
後爲京城巡檢中夜詣王溥第溥驚悸而出曰此夕巡  
警甚困聊就公一醉耳彥昇意在求賄溥佯不悟置酒  
數行而罷翌日溥密奏其事乃出爲唐州刺史歷原州  
防禦使卒彥昇殘忍多方西人有犯漢法者彥昇乃僚  
屬飲宴引所犯以手捽斷其耳大嚼卮酒下之其人流  
血被體股慄不敢動前後喑者數百人西人畏之不敢  
犯塞帝以其專殺韓通終身不授節鉞

論曰世有母望之福必資母望之人昔人嘗談之矣宋  
太祖以點檢與自陳橋周禁衛石守信諸人並改心效

勞翼贊大業若王彥昇殺韓通羅彥瓌挺劍迫范質尤  
其雄者原其心豈直知神器之有屬歟抑徒貪功以徼  
利也天下既定太祖喻釋守信等丘權褒恤韓通終斬  
彥昇節鉞誠得馭臣之道哉

宋史新編卷六十六

列傳八

詔南京戶部主事莆田柯維騏著

韓令坤

慕容延釗

子德會符彥卿  
子昭愿昭壽

韓令坤武安人父倫起兵籍累遷徐州下邳鎮將兼守禦指揮使以令坤貴擢陳州行軍司馬徙許州罷職後坐不法當棄市令坤泣請於周世宗乃流海島顯德中再遷左監門衛將軍宋遷至亳州防禦使卒令坤少隸周祖帳下得擢禁衛世宗時累功遷至檢校太尉鎮安軍節度使後爲霸州都部署恭帝卽位加侍衛馬步軍都虞候宋初移領天平軍加侍衛馬步軍都指揮使同

平章事太祖征李筠詔令坤率兵屯河陽以功加兼侍  
中又從討李重進明年改成德軍節度充北面緣邊兵  
馬都部署將赴鎮上於別殿置酒餞之卒年四十六錄  
其二子令坤有才略識治道與太祖同事周室情好親  
密鎮常山凡七年北邊以寧聞其卒甚悼惜之

慕容延釗太原人少以勇幹隸周祖帳下歷鐵騎都虞  
候世宗卽位以功遷至殿前副都指揮使領淮南節度  
恭帝卽位改鎮寧軍節度充殿前副都點檢復爲北面  
行營馬步軍都虞候太祖卽位延釗方握重兵屯眞定  
帝許以便宜從事按治邊境以鎮靜聞加殿前都點檢

同中書門下三品避其父名章也討李筠爲行營都部  
署知潞州行府事及平加兼侍中詔還澶州建隆二年  
徙爲山南東道節度西南面兵馬都部署乾德元年春  
命師南征以延釗爲湖南道行營前軍都部署荆湘旣  
平加檢校太尉卒年五十一初延釗與太祖友善顯德  
末太祖任殿前都點檢延釗爲副常兄事延釗及卽位  
每遣使勞問猶以兄呼之贈中書令追封河南郡王官  
其子弟四人子德豐從子德琛竝知名

德豐字日新幼聰悟八歲補山南東道衙內指揮使開  
寶中從征太原歷諸州都監其在昇州也澤國富饒德



豐獨以廉潔聞太宗真宗時屢爲邊帥知慶延鎮滄諸州邊境安之積遷至客省使德豐輕財好施厚享將士在西邊毋留京師妻孥寓長安貧甚真宗憫之詔給團練使奉踰年進潁州團練使知貝瀛二州卒家無餘財談者善焉

德琛以蔭入官事太宗真宗初知夔州累有破賊功及爲荆湖北路鈐轄蠻擾澧鼎境上與戰多斬獲再知夔州再徙峽路鈐轄積官至莊宅使又爲丹代鈐轄知憲州改右門衛大將軍

符彥卿字冠侯宛丘人後唐宣武軍節度存審之子年

十三能騎射事莊宗於太原以謹愿出入臥內及長爲  
親從指揮使歷易州刺史兼領北面騎軍晉初授同州  
節度改鎮鄜延又鎮河陽三城契丹南侵詔彥卿拒戰  
澶淵擊走之移鎮許州封祈國公開運中與杜重威李  
守真經略北鄙契丹率衆圍晉師于陽城軍中乏水鑿  
井輒壞爭絞泥吮之人馬多渴死又居下風弓弩莫施  
彥卿謂諸將曰與其束手就擒曷若死戰遂潛兵尾其  
後順風擊之契丹大敗改武寧軍節度同平章事爲左  
右所間會再出師河朔彥卿不預易其行伍配以羸師  
數千戍荊州口及杜重威以大軍降於滹水急詔彥卿

與高行周領禁兵屯澶淵會張彥澤引契丹入汴彥卿  
與行周遂歸契丹漢祖入汴彥卿自徐州來朝改鎮兗  
州加兼侍中後加兼中書令封魏國公拜守太保移鎮  
青州仕周爲大名尹天雄軍節度進封至魏王加守太  
尉太祖卽位加守太師開寶中移鳳翔節度被病許就  
醫洛陽滿百日猶請其奉爲御史所劾罷節制卒年七  
十八彥卿將家子善用兵契丹自陽城之敗尤畏彥卿  
或馬病不飲齧必唾而呪曰此中豈有符王邪時藩鎮  
率遣親吏受民租槩量增溢公取其餘羨而魏郡尤甚  
太祖遣常參官主其事由是斛量始平詔以羨餘粟賜

彥卿彥卿酷好鷹犬少年獵遂城鹽臺淀一日射鷹疑  
狼狐兔四十二觀者神之謙恭下士對賓客終日談笑  
不及世務不伐戰功居洛陽八年每春月乘小駟從家  
僮一二遊僧寺名園優游自適周世宗后及宋太宗后  
皆其女也子昭信在周由武階領賀州刺史卒贈檢校  
太保閬州防禦使次昭愿昭壽曾孫惟忠在外戚傳

昭愿字致恭謹厚謙約頗讀書好事廣順中蔭補天雄  
軍牙職又領興州刺史仕宋遷至州團練使歷知諸州  
軍咸平初爲天雄軍邢州二鈐轄以疾求歸京師拜本  
州防禦使卒贈鎮東軍節度使

昭壽初補供奉官累遷光州刺史知洪州定州咸平初  
遷鳳州團練使益州鈐轄昭壽以貴家子簡倨自恣常  
紗帽弊衣偃息後圃不理戎務有所裁決卽令家人傳  
道多集錦工織織麗綺帛每有所須取給於市餘半歲  
方給其直廣糴黍稻貯寺觀中久之損敗卽勒償縱其  
下凌忽軍校神衛卒趙延順等八人謀殺昭壽斷其首  
據甲仗庫取兵器擁都虞候王均爲帥合驍猛威武兵  
爲亂事見雷有終傳子承諒娶齊王女

論曰世之治亂豈不由人哉五季權臣擅朝藩鎮專制  
境內天子擁虛器若瞽旒宋興顏綱乍振率土聽命無

或干威福以貽禍凶雖否運必反要亦太祖駕馭之有道也符彥卿國戚韓令坤慕容延釗帝平生歡彥卿優將略邊徼憚其威名令坤延釗定荆湘鎮常山之績並懋然皆不恃寵不伐功而君臣始終無猜嫌斯開國之美談云

王景

子廷義

王晏

郭從義

會孫承祐

李洪信

弟洪義

武行德

楊承信

侯章

王景萊州掖人少倜儻善騎射不事生業結里中惡少為群盜梁大將王檀鎮滑臺以隸麾下與後唐莊宗戰

河上檀有功景嘗左右之莊宗入汴景來降累遷奉聖  
郤虞候清泰末從張景達圍晉陽會契丹來援景遂歸  
晉祖累功遷至橫海軍節度漢乾祐初加同平章事周  
祖微時善景及卽位加兼侍中景素無智略然臨政不  
尚刻削有訟必面詰非大過卽諭而釋去不爲胥吏所  
侮部民便之廣順初入朝民數百遮道留不獲有截馬  
齒者俄以景爲護國軍節度已而遷鎮鳳翔顯德初封  
褒國公加開府階世宗卽位加兼中書令歷鎮秦州兼  
西面緣邊都部署恭帝卽位進封涼國公宋初加守太  
保封太原郡王明年復以爲鳳翔節度西面緣邊都部

署卒贈太傅追封岐王謚元靖初景奔晉妻坐戮二子  
逃免晉祖待之厚賞賜萬計嘗問景所欲對曰臣昔爲  
卒屢過官妓侯小師家意甚慕之今得爲妻足矣晉祖  
大笑卽以賜景累封楚國夫人侯氏嘗盜景金遺舊人  
景知而不責景性謙退旣貴猶折節下士云長子廷義  
亦善騎射起家供奉官遷至龍捷右第二軍都校領珍  
州刺史宋改內外馬步軍副都軍頭又加領橫州團練  
使從征太原親鼓士乘城獨免胄矢中其腦卒優詔贈  
建雄軍節度廷義性驕傲好吟誕每言我當代王景之  
子人目爲王當代



王晏徐州滕人少無賴後唐應募隸禁軍累遷奉國小  
校晉開運末與都校趙暉等戍陝州會契丹至汴遣其  
將劉愿據陝恣行暴虐晏謀曰英雄豪傑固當乘時自  
奮若殺愿送款河東爲天下唱首則取富貴如反掌耳  
暉等然之晏乃率敢死士夜踰城入府署劫庫兵給其  
徒運明斬愿首懸府門外遣其子漢倫奉表晉陽漢祖  
連遷晏建雄軍節度及入汴加同平章事周祖卽位加  
兼侍中劉崇侵晉州漢倫追北擢漢倫濱州刺史周祖  
以晏家彭城授武寧軍節度俾榮其鄉里郊畢封滕國  
公加開府階世宗卽位加兼中書令初晏至鎮悉召故

時同爲盜者遺以金帛從容置酒語之曰吾鄉素多盜  
我與諸君昔嘗爲之後來者固當出諸君之下爲我告  
諭令不復爲吾必盡滅其族由是境內安靜吏民詣闕  
舉留請爲晏立衣錦碑世宗初復請立德政碑詔改其  
鄉里爲使相鄉勳德里私門立戟未幾改河南尹西京  
留守移鳳翔節度太祖卽位改安遠軍節度累封韓國  
公上章請老拜太子太師致仕贈中書令初晏爲軍  
校與平陸人王興善其妻亦相爲娣姒晏旣貴薄興興  
不能平晏妻病興語人曰吾能治之晏遽訪興興曰我  
非能醫但以公在陝時止一妻今妓妾甚衆得非待糴

糠薄耶若能斥去女侍疾可立愈晏以爲謗已乃誣以他事并其妻誅之

郭從義其先沙陁部人父紹古事後唐武皇忠謹特見信任賜姓李氏紹古卒從義補內職累遷內園使晉天福初始復姓坐事出爲宿州團練副使漢祖在鎮表爲馬步軍都虞候及建大號從義首贊其謀擢鄭州防禦使討降杜重威擢鎮寧軍節度及討趙思綰以爲永興軍節度從義說思綰令降因并其黨三百人悉斬於市以功加同平章事周廣順初加兼侍中移鎮許州顯德初加檢校太師從符彥卿破砮罕還加兼中書令從征

淮南移鎮徐州恭帝卽位加開府宋初加守中書令又  
爲河中尹護國軍節度改左金吾衛上將軍逾年請老  
拜太子太師致仕卒贈中書令初思綰之叛巡檢使喬  
守溫遁去姬妾悉入思綰及敗從義盡取之守溫詣從  
義求其愛妾雖不敢拒而心銜焉遂發守溫逃遁事坐  
棄市人皆寃之從義善擊毬嘗侍太祖便殿命擊之易  
衣跨驢馳驟殿庭曲盡其妙旣罷上賜坐謂之曰卿技  
固精然非將相所爲從義大慙

承祐字天錫從義四世孫也娶舒王元偁女授西頭供  
奉官仁宗爲皇太子承祐補左清道率府率春坊左謁

者及卽位累遷西上閣門副使坐事除名岳州編管徙  
許州別駕累進六宅使象州團練使承祐性狡獪緣東  
宮恩又憑藉王邸親旣廢復用迺僭言事或指切人過  
失同列謂之武諫官歷定州等路副都總管歐陽脩余  
靖論其非才改知相州遷至建武軍節度使尋以宣徽  
南院使判應天府徙亳州諫官言承祐出入擁旗槍以  
禁兵擬周衛體涉狂僭無人臣禮罷官徽南院使許州  
都總管徙節保靜軍知許州轉運使蘇舜元薦承祐有  
將帥才政事如龔黃帝謂輔臣曰彼庸人監司乃龔黃  
比之何所取信哉改知鄭州未行卒贈太尉諡曰密

李洪信并州人漢昭聖太后弟也晉初爲興順左廂都  
指揮使加岳州防禦使從漢祖降鄴以勞授侍衛馬軍  
都指揮使領武信軍節度乾祐中群小用事心懷憂懼  
白太后求解軍職出爲鎮寧軍節度歲餘遷保義軍周  
廣順初加同平章事洪信常以妄殺自歎及革命內不  
自安懇辭藩鎮拜左武衛上將軍遷左驍衛上將軍後  
改右龍武軍統軍乾德五年復改左驍衛上將軍數年  
請老以本官致仕卒洪信無他才術徒以外戚致位將  
相好殖財累鉅萬云弟洪義

洪義本名洪威避周祖名改焉漢祖鎮太原補親校及

開國遷至侍衛馬軍都指揮使領武信軍節度少帝卽  
位改鎮寧軍節度會誅楊邠史弘肇等時騎將王殷屯  
澶州卽遣供奉官孟業齎密詔令洪義殺之又令郭崇  
等害周祖於鄴洪義素懦慮殷覺遽引業見殷殷乃錮  
業送密詔於周祖洎周祖起兵少帝又詔洪義扼河橋  
周祖兵至洪義就降漢之亡由洪義也歷加開府階宋  
加兼中書令卒贈太師

武行德并州人身長九尺餘膂力絕人家貧常採樵自  
給晉祖鎮并門以隸帳下遷至寧國軍都虞候開運中  
契丹至汴行德被獲乃僞請自效契丹信之方具舟數

十艘載鎧甲今行德率將校軍卒送歸其國沂汴至河陰行德卽殺契丹監使分授器甲由汜水倍道抵河陽契丹節度使崔廷勳出兵來拒行德麾衆逆擊廷勳大敗棄城走行德遂據河陽盡以府庫分給將士聞漢祖起太原卽自稱河陽都部署遣其弟行友問道奉表勸進漢祖卽授河陽三城節度漢祖由晉絳至洛行德迎候境上以所部兵翼至京師還河陽乾祐中加同平章事周初加兼侍中旣而改忠武軍節度遷河南尹西京留守特禁鹽入城犯者法至死告者給厚賞洛陽民家嫗將入城鬻蔬俄有僧從嫗買蔬密置鹽筥中少答其



直不買而去抱關者擒以詣府行德疑而詰之卽捕僧訊治具伏與關吏同誣希賞行德釋姬斬僧及關吏數輩人畏之若神明部下凜然後加開府階又兼中書令累封宋國公宋初授忠武軍節度改封魏國公後入爲太子太傅太宗時致仕卒年七十二贈太師

楊承信字守真其先沙陁部人以父太師光遠任歷宣武平盧二軍牙校開運初光遠以青州叛承信兄承勳劫其父以降青州平光遠死承信與弟承祚詣闕請死並釋而官之承信遂爲平盧軍節度繼父職仕漢歷安鄆二州節度累加檢校太師周封魯國公宋初加兼侍

申封趙國公卒年四十四贈中書令承信身長八尺美儀表善持論且多藝能雖叛臣之子然累歷藩鎮刻勵爲政而不苛故能始終富貴其卒也蒲民表乞祠之真宗命錄其孫

侯章并州人初事後唐莊宗爲隊長晉歷內外馬步軍都指揮使兼三城巡檢使與趙暉王晏謀斬契丹將送款漢祖得擢鎮國軍節度尋移鎮邠州章居鎮以貪猥聞副使趙彥鐸有良馬章欲之不與誣彥鐸謀逆殺之周初加兼侍中又授鄧州節度封申國公世宗加兼中書令再爲武勝軍節度宋初授太子太師封楚國公旣

罷節鎮居常快快卒

論曰五代兵戈倏擾乃武夫自奮取富貴之會也王景輩半起鄙賤無賴竝能表見材略躡閫帥爵上宰宋興猶不失寵榮非生遇其時然耶景殃及其家李洪義亡人之國王晏侯章郭從義以小忿駕慘禍所謂德薄位尊免於戮辱幸矣若武行德之察寃楊承信之遺愛其庶乎

宋史新編卷六十七

卷六十七

列傳九

明南京戶部主事莆田柯維騏著

折德裒

子御勳御卿

會孫克行

以繼業

王承美

李繼周

孫行友

子金熙

折德裒世居雲中爲大族父從阮自晉漢以來獨據府州控扼西北中國賴之仕周至靜難軍節度使周世宗建府州爲永安軍以德裒爲節度使時從阮鎮邠寧父子俱領節鎮時人榮之宋初來朝遣歸乾德元年敗太原軍擒其將楊璘卒贈侍中子御勳御卿

御勳字世隆初權知府州事開寶二年爲永安軍留後

末年改秦寧軍節度使留京師卒贈侍中

御卿繼知府州淳化五年拜永安軍節度使一日契丹

擁萬餘衆入寇御卿帥兵大敗之於于河汭其大將韓

德威僅以身免歲餘御卿被病德威謀知之復率衆來

侵以報于河汭之役御卿力疾出戰會疾甚其母密遣

人召歸御卿曰爲白太夫人無念我忠孝豈兩全言訖

泣下翌日卒年三十八贈侍中以子惟正爲洛苑使知

州事惟正歸朝以弟惟昌繼之惟昌以功領富州刺史

歷興州刺史卒以弟惟忠繼之惟忠字蓋臣初以兄惟

信戰沒補西頭供奉官擢閣門祗候及惟昌卒以惟忠

爲六宅使知府州歷簡州團練使既卒錄其弟姪子孫  
七人以其子繼宣嗣州事實元中繼宣坐苛虐倍刻種  
落嗟怨紂爲左監門衛將軍楚州都監擢其弟石侍禁  
繼閔爲西京作坊使嗣州事繼閔字廣孝歷果州團練  
使自元昊反繼閔招輯歸業者二千餘戶既卒以其弟  
繼祖嗣州事繼祖字應之累轉皇城使成州團練使韓  
絳發河東兵城羅兀繼祖爲先鋒深入敵帳降部落戶  
八百加解州防禦使卒繼祖有子當襲州事請以授兒  
之子克柔詔從之而進其三子官錄二孫弟繼世以左  
驍驍使果州團練使卒以捍邊有績特詔給賻從子克

行

克行字遵道繼閔子也初與夏人戰葭盧川先登斬級  
四百降戶千馬畜萬計諸老將矍然曰真折太尉子也  
擢知府州在邊三十年善拊士卒戰功最多羌人呼爲  
折家父官至秦州觀察使卒子可大爲榮州團練使知  
府州從子可適未冠有勇馳射不習而能補殿侍從种  
諤出塞遇敵騎以少年易之可適索與鬪斬其首取馬  
而還益知名前後以功至皇城使成州團練使知岷蘭  
州鎮戎軍渭帥章察合三道兵築好水川命總管王文  
振統之而可適將軍爲副熙州兵千人失道盡死案下

可適吏哲宗從輕比削十三官而罷案請留以責效乃以權第十二將嵬名阿埋昧勒都逋皆夏人桀黠用事者詔可適密圖之會二酋以畜牧爲名會境土可適謀知夜襲之并俘族屬三千人遂取天都山帝御文德殿受賀以其地爲西安州遷東上閣門使洛州防禦使涇原鈐轄知州事進明州觀察使爲副都總管帥鍾傅行邊爲敵所隔以輕騎拔歸進武安軍節度觀察留後步軍都虞候大城蕭關與傅議齟齬會覆師爲所劾貶鄭州觀察使俄知衛州拜淮康軍節度使以疑謗召爲佑神觀使明年復以爲渭州命其子彥質直祕閣參軍事



未幾卒彥質紹興中簽書樞密院事

馮繼業字嗣宗大名人父暉朔方節度封衛王繼業殺  
兄代父領鎮頗驕恣時出兵劫略羌夷羌夷不附又撫  
士卒少恩繼業慮變以太祖居鎮日嘗得給事乃豫徙  
其孥闕下建隆初來朝後拜靜難軍節度使又改鎮定  
國軍有遺愛太宗封梁國公卒贈侍中

王承美豐州人本河西藏才族都首領其父事契丹爲  
左千牛衛將軍開寶二年率衆來歸承美授豐州牙內  
指揮使父卒改天德軍蕃漢都指揮使知州事移豐州  
刺史後以功授本州團練使歷防禦使卒錄其子文寶

孫懷筠初承美養其長孫文玉爲子及卒其本族首領  
上言文玉曉達軍政請令襲任下蕃漢議同以爲侍禁  
知州事文玉父文恭時爲侍禁詔改供奉官

李繼周金明人祖父皆爲金明鎮使繼周嗣掌本族太  
平興國三年補殿前承旨累功歷西京作坊副使咸平  
中歷授作坊使景德元年夏人圍麟州繼周受詔率兵  
會李繼福掩擊之加領誠州刺史卒邊臣言其子殿直  
士彬遜悞從子士用村忠練邊事且爲部落所伏乃詔  
士彬管勾部族事士用爲巡檢都監以左右之元昊反  
潛兵襲金明士彬父子俱被禽李繼福者亦與繼周同

時歸順以戰功歷諸族都巡檢

孫行友莫州人世業農初定州有狼山舊有城堡邊人賴以避寇山中蘭若有尼孫氏名深意術頗惑衆行友兄子方諫名之爲姑師事甚謹及尼坐亡行友益神其事因以其術然香燈聚民漸衆自晉少帝與契丹絕好邊州困於轉輸逋民往往依方諫推以爲帥方諫懼主帥捕逐乃表歸朝因署爲東北面招收指揮使賜院額曰勝福每契丹軍來必率其徒襲擊之鎧仗畜產所得漸多人益依以避難焉易定帥聞于朝因以方諫爲邊界遊奕使行友副之邊民千餘家賴以無患然亦陰持

兩端以圖自固已而蘄人導契丹陷中原方諫之密構也契丹授方諫定州節度行友易州刺史尋歸命於漢授行友易州刺史行義泰州刺史周祖北征行友請自效及受命移方諫鎮華州以行友爲定州留後世宗時方諫徙鎮匡國卒行友顯德初正授節鉞後加檢校太傅世宗北征行友攻下契丹之易州擒其刺史任欽以獻宋初加同平章事狼山佛舍妖妄愈甚衆趨之不可禁行友不自安累表乞解官歸山不允建隆二年乃徙其帑廩召集丁壯繕治兵甲欲還狼山以自固事聞詔舉族赴闕行友坐削爵勒歸私第仍戮其部下數人焚

其狼山尼師之屍弟易州刺史方進兄子保塞軍使全暉皆詣闕待罪詔釋之行友後起遷左龍武軍大將軍卒贈左衛上將軍方進至德州刺史子全照

全照字繼明以蔭歷東上閣門使領英州刺史全照形短精悍知兵以嚴毅整衆然性剛使氣專任刑罰初授嚴州刺史真宗曰此州似涉譏諷乃改焉景德三年爲分寧環慶都部署趙德明納款朝議減西鄙戍兵屯近地全照未卽奉詔上曰全照是好勇多言者德明使已至闕何慮爲因徙知永興軍府仍拜四方館使大中祥符中遷引進使踰歲表求歸朝命掌閣門客省四方館

事四年車駕西幸留爲新城都巡檢卒

論曰五代契丹憑陵竝邊諸族時爲捍禦然世據土握兵天子但羈縻而已宋興契丹叛服不常太宗以來夏州繼起爲患不能不軫廟堂之慮而曲爲之防是時雖革世將特於折氏諸族寵數加優許以承襲而難不愛死罪不辭罰羈束服習若牛馬然揚子雲謂御之得其道則徂詐咸作使其弗信邪折德袞而下疊產名將勳節竝懋王承美李繼周分蒞徠落克世其職君子以爲難若馮繼業孫行友輩豈以微勞而掩巨慝哉

侯益

子仁矩仁實孫延廣

張從恩

扈彥珂

薛懷讓

趙贊

李繼勳

藥元福

趙晁

子延厚

侯益平遙人以拳勇從莊宗累功遷至馬軍直指揮使  
莊宗入汴爲本直副都校從明宗討趙在禮於鄴會諸  
軍推戴明宗益脫身歸洛莊宗撫其背出涕明宗立益  
面縛請罪明宗曰爾盡節忠又何罪也歷羽林軍五十  
指揮都校領費州刺史出爲商州刺史加西面行營都  
巡檢使晉初爲奉國都校領光州防禦使范延光反大  
名張從賓據河陽爲聲援晉祖命益率禁兵數千人討  
之次虎牢從賓軍萬餘人夾汜水而陣益親鼓士乘之

大敗其衆從賓墮水死拜河陽三城節度遷武寧軍然  
度同平章事仍賜門戟改鄉里爲將相鄉勳賢里明年  
徙鎮秦州會蒲帥安審琦移鎮許下以益爲河中尹兼  
國軍節度契丹入汴益率僚屬歸京師詣契丹主自請  
不預北伐之謀契丹授以鳳翔節度漢祖卽位加兼上  
中益自以嘗受契丹命聞漢兵入洛憂之浚城隍爲堞  
孟昶遣益所親齎書招益遂與其子歸蜀昶兵數萬出  
大散關以應之漢祖知其事遣客省使王景崇率禁卒  
數千倍道召益入朝景崇破蜀軍益懼卽謀入朝會  
漢祖崩卽率數十騎奔入朝隱帝遣侍臣問益結連



軍之由益對曰臣欲誘之出關掩殺之耳益厚賂史弘  
肇輩深庇護之乃授以開封尹兼中書令俄封魯國公  
景崇聞之遂據城叛益親屬在城中餘七十口悉爲景  
崇所害及周祖起兵隱帝遣益等守澶州至赤岡周師  
奄至戰留子陂漢軍不利益乃與焦繼勳等夜謁周祖  
周祖慰勞遣還廣順初封楚國公改太子太師俄又改  
封齊國公顯德元年致仕歸洛太祖以耆舊厚待之乾  
德中卒年八十五贈中書令子仁矩仁寶知名仁矩宋  
初歷祁雄二州刺史治軍有方略仁矩數郡咸有善政卒  
子延廣延之進士及第

仁寶蔭遷太子中允卽趙普妹婿盧多遜與普隙普罷相卽以仁寶知邕州九年不代太平興國中上言陳取交州之策太宗大喜令召歸多遜據奏曰若召仁寶其謀必泄不如授飛輓之任且經度之別遣偏將發荆湖兵長驅而往勢必萬全遂以仁寶爲交州水陸計度轉運使遇賊爲所害死江中贈工部侍郎錄其二子

延廣初在襁褓中遭王景崇之難乳母劉氏以己子代死行丐抱持至京師還益父仁矩在雄州日方飲宴虜數十騎白晝入州城延廣引數騎馳出射殺酋長斬禽其餘黨仁矩喜拊其背曰與吾門者必汝也仁矩卒補

西頭供奉官累遷崇儀副使充同鄜坊延丹緣邊都巡檢使戎人聞延廣至不敢復爲寇亂叛卒劉渥嘯聚亡命寇富平縣其勢甚盛延廣率兵追之渥素憚延廣傳言侯公家世富貴奈何處士卒乎一旦之命於鋒鏑之下延廣怒因擊之挺身與渥鬪大樹下斷渥右臂大破其衆渥素號驍勇無敵至是爲延廣所殺群盜喪氣餘黨稍稍自歸關右以定擢拜崇儀使淳化二年知靈州旣而爲延州鈐轄會節帥田重進老耄以延廣同知州事兼緣邊都巡檢使先是知靈州部下嚴整戎人悅服李繼遷素避其鋒爲監軍康贊元所讒遽召還至道間

繼遷寇靈州朝廷謀帥錢若水稱延廣可使就拜寧州  
團練使知靈州兼兵馬都部署賜白金二千歲增給錢  
二百萬戎人相率引避未幾卒

張從恩太原人父存信振武軍節度晉祖鎮河東爲少  
帝娶從恩女晉初擢右金吾衛將軍歷樞密副使宣徽  
南院使權西京留守俄判三司少帝嗣位遷檢校太尉  
開封尹充東京留守少帝自鄴歸汴改鄴都留守明年  
加同中書門下平章事開運初改天平軍節度二年移  
鎮晉州又改潞州及契丹入汴從恩欲降從事高防諫  
不聽棄城去巡檢使王守恩悉取其家財以城歸漢祖

漢祖至汴從恩惶懼不敢出漢祖召賜器幣尋拜右衛  
上將軍奉朝請周初遷左金吾世宗立加檢校太師封  
褒國公宋初改封許國公以病免

扈彥珂鴈門人晉天福中補河東節度左都押衙漢祖  
擢至鎮國軍節度華商等州觀察處置等使乾祐初河  
中李守貞永興趙思綰鳳翔王景崇竝據城叛時議多  
以先討景崇思綰為便彥珂曰宜先擊河中河中平則  
永興鳳翔失勢矣周祖從其言及平河中以功遷護國  
軍節度廣順初就加同平章事移鎮滑州世宗嗣位授  
左衛上將軍顯德三年授開府儀同三司太子太師致

仕太祖卽位遣使就賜器幣數月卒

薛懷讓其先戎人少勇敢喜戰鬥後唐歷絳州刺史清泰初移申州晉天福中歷沂遼密懷四州刺史所至頗事誅斂以討賊功改宿州團練使契丹歲擾邊陲命懷讓爲洛州團練使旣而從杜重威討契丹重威降契丹於中渡橋懷讓亦在籍中非其志也契丹主北歸留麻荅守鎮州麻荅遣步健督洛州供運懷讓聞漢祖舉義晉陽卽殺步健奉表歸漢邢州僞帥劉鐸納款漢祖懷讓遣人給鐸輒開門迎之因殺鐸奪其城漢祖卽授安國軍節度隱帝卽位移鎮同州及殺楊邠等急召懷讓

至闕會北郊兵敗懷讓降于周祖加同平章事夏陽富人張廷徽誣告趙隱等五人爲盜殺人厚賂懷讓子有光懷讓遂成其獄隱等皆棄市家人詣闕訴寃俄捕獲本賊周祖以宿將釋不問俄以爲左屯衛上將軍世宗卽位加左武衛上將軍顯德五年拜太子太師致仕恭帝卽位封杞國公宋初卒贈侍中懷讓好畜馬馳馬有大鳥小鳥者尤奇駿傾資給芻粟朝夕閱視爲娛及死童僕皆斃面以哭蓋其俗也

趙贊字元輔本名美幽州薊人祖德鈞後唐盧龍節度封北平王父延壽尚明宗女至忠武軍節度贊幼聰慧

應神童舉明宗詔賜童子及策仍附禮部春牒清泰末  
晉祖起并門命延壽將兵屯上黨德鈞將本軍自幽州  
來會時晉祖以契丹之援引兵南下德鈞父子降晉契  
丹主盡錮之北去贊獨與母公主留西洛天福三年晉  
祖命贊奉母歸薊門契丹署爲金吾將軍數年契丹以  
延壽爲范陽節度又署贊爲牙內都校開運末契丹主  
將謀南侵委政延壽及平原陷贊復受契丹署爲河中  
節度延壽從契丹北歸贊得留鎮河中未幾漢祖起晉  
陽贊奉表勸進加檢校太尉仍鎮河中改京兆尹晉昌  
軍節度贊懼漢疑已潛遣奉表歸蜀判官李恕語贊漢



方建國理難萬全請先入朝爲公申理贊卽遣恕詣闕  
恕曰贊家在燕薊身受契丹之命自懷憂恐謂陛下終  
不能容招引西軍蓋圖苟免國家甫定務安臣民所以  
令臣乞哀求覲漢祖曰贊父子亦吾人也事契丹出於  
不幸今聞延壽落陷弃吾忍不容贊耶恕未還贊已離  
鎮入朝命爲左驍衛上將軍仕周歷左右羽林左龍武  
三統軍以戰功累遷保信軍節度贊盡去苛政務從寬  
簡居民使之恭帝卽位加開府階宋初加檢校太師歷  
三鎮太祖討晉陽以爲行營前軍馬步軍都虞候弩矢  
皆足帝勞問數四賜以良藥改鎮鄜州太宗封衛國公

卒年五十五贈侍中贊書爲詩容止閒雅接士大夫以禮馭衆有方略吏民畏服亦近代賢帥也

李繼勳大名人周初補禁軍列校累遷節度使以喪師左授後以功復遷至安國軍節度加檢校太傅宋初加檢校太尉以爲昭義軍節度率師入河東燔平遙縣俘獲甚衆建隆二年冬又敗并軍獲其遼州刺史來獻乾德二年詔同諸將率兵攻遼州太原將郝貴超領兵來援大敗之州將杜延韜等籍部下兵三千送款未幾并人誘契丹來取遼州復遣繼勳等領六萬衆赴之大破契丹及太原軍於城下五年加同平章事開寶中移鎮

大名太宗卽位加兼侍中以疾請老拜太子太師致仕  
尋卒贈中書令繼勳累歷藩鎮所至無善政然以質直  
稱與太祖有舊故特承寵遇弟繼儼亦有武勇歷龍衛  
右廂都指揮使領本州團練使

藥元福晉陽人勇敢善騎射事後唐爲拱衛威和親從  
馬鬪軍都校天平軍內外馬軍都指揮使歷晉漢累立  
戰功遷至淄州刺史周初討楊溫拒劉崇又討慕容彥  
超咸有功遷至建雄軍節度世宗高平之戰劉崇敗走  
太原縱兵圍之以元福爲同州節度充太原四面壕砦  
都部署糧運不繼詔班師元福上言進軍甚易退軍甚

難世宗曰一以委卿遂部分卒伍爲方陣而南元福爲後殿崇出兵來追元福擊走之加檢校太尉移鎮陝州又歷定廬曹三鎮宋初加檢校太師卒贈侍中元福雖老筋骨不衰人或言其氣貌益壯當復領兵必大喜曲致禮待或加以贈遺時稱驍將

趙晁真定人儀貌雄偉初事周祖麾下及開國擢至作坊使不滿所望頗怏怏樞密使王峻秉政晁疑其軋已一日使酒詣其第毀峻峻不之責世宗立歷轉虎捷左廂都指揮使領閬州防禦使從征淮南時李重進敗吳人于正陽以降卒三千人付晁晁一夕盡殺之壽春平

拜檢校太保河陽三城節度恭帝即位加檢校太傅宋  
初加檢校太尉未幾卒再贈侍中晁性貪好聚斂以周  
初與宣祖分掌禁軍有宗盟之分故太祖常優禮之子  
延溥

延溥周顯德中以父任補左班殿直宋初歷改鐵騎都  
虞候太宗卽位歷改馬步軍都虞候從平太原略地燕  
薊六軍扈從有後期至者帝怒欲寘于法延溥遂進曰  
契丹未殄而誅讜將士若舉後圖誰爲陛下戮力乎帝  
嘉納之師還遷至日騎天武左右廂都指揮使兼權殿  
前都虞候事坐遣親吏市竹木矯稱制免等左授後歷

遷蔚州觀察使判冀州會命曹彬等北征又爲幽州西北道行營都監師還再知貝州卒贈天德軍節度孫咸  
熙天聖八年進士及第

論曰五代之亂介冑易於立功往往累將相宋太祖待以勳舊兩無猜疑如李繼勳趙贊之敵愾何其壯也侯益扈彥珂薛懷讓在周已請老其餘徒冒寵榮亦年邁矣益素行勳反覆懷讓趙鼎忍於殺降張從恩晉室肺腑之親不能盡節斯皆徂於亂世之習奚足數哉

新編卷六十七

新編卷六十七